



UPA 2014/50.1
29.04.2014
Kalistat Lund

Ujaqqanik pinneraasiassanik annikitsumik aatsitassarsiornermik tunnga-veqartumik kalaallit ujaqqanik pinneraasiassanik avammut tunisassiornerup ineriartortinneqarnissaanut periarfissanik nassuiaasioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat ujaqqanik pinneraasiassanik kalaallit tunisassiaannik avammut tunisassiornerup akimmiffiinik periarfissaanillu aamma allaatiginniffioqquneqarpoq.

(Inatsisartunut ilaasortaq Aqqaluaq B. Egede, Inuit Ataqatigiit)

Siunnersuuteqartoq Aqqaluaq B. Egede isumaqatigaarput, annikitsumik aatsitassarsiornermik ingerlatsinikkut, ujaqqanik pinneraasiassanik allatulluunniit ujaqqanik iluaquteqarsinnaannerup nunatsinni najugalinnit annertunerusumik iluaqutigin eqarsinnaannerulernissaa siunertaralugu periarfissarsiuussisoqarnissaanik ujar-tueqqusimmat.

Isumaqarpugut naalakkersuinikkut siunnerfiussasoq, annikitsunik aatsitassarsiornermik ingerlatsinerit inuit maanni najugallit inorsinnagit pisinnaannissaat periarfissarsiuunneqassasoq.

Ingerlatseqatigiiffeqarnikkut periarfissat assigiinngitsut misissorneqarnissaat kisaatigaarput, inuit maanni najugallit soqutiginnittut piginneqataaffigisinnaasaattut ilusiligaasussanik.

Annikitsumik aatsitassarsiornermik ingerlatsinernut suliffeqarfiit nunatta avataanniit soqutiginnittut, nunatsinni ingerlatseqatigiiffiup ataanni inissisimasussaataannissaat aqutissiuunneqassasoq isumaqarpugut. Tassuunnakkut qulakkeersimaarneqassamat nunatta soqutigisaasa nakkutigilluarneqarnerusinnaannerat minnerunngitsumik ujaqqanik suliareqqinneqanngitsunik asuli annisuiinnarsinnaanneq killilersimaarneqassamat.

Nunatsinni ujaqqat pinneraassiarineqartarnerat misilittagaqarfigineqarluareersoq ilisimavarput. Inuit pinneraassiornermik piginnaassallit, pinneraassiarineqarsinnaasunik ujaqqanik soqutiginnittut sumiiffinnillu ilisimannittut tamaasa suleqatigalugit, nunatsinni ujaqqanik pinneraassiornermik ineriartortitseqqinnissamik siunniussineq isumaqatigaarput.

Ujaqqat pinneraassiasat nalinitseqqaarnagit nunatsinnit anninneqartarnissaat pingitsoorniarneqartariaqarpoq. Pinneraassioriaatsinut aalajangersimasunut sungiussisimaneq nunatsinni amigaatsigineqartillugu avataanniit sungiusaasuujutigalutik, killilimmik sivisussusilimmik, sulisussanik tikisitsinnaassarnissat periarfissaassinnaassussatut isigaarput.

Nunarsuarmi pinneraassionernik ingerlatsinerit nunani tamani suliffippassuit pilerfigisimavaat. Nunarput aamma tassuuna periarfissagissaarmat aaqqissuulluakkamik ineriartortillugu nunatsinni suliffissaqarfiit pingaarutillit ilaattut inissisimalersinnaanera periarfissaalluarsoraarput.

Siunnersuut taperserlugu ataatsimiitsitaliami susassaqartumut ingerlatinneqarnissaa innersuussutigaarput.